

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

**Broj: 01/1-06-Z/17
Kakanj, 31.03.2017. godine**

**Z A P I S N I K
sa 6. redovne sjednice Općinskog vijeća održane 31.03.2017. godine (petak) u velikoj sali za
sastanke Općinskog vijeća sa početkom u 9:00 sati
(sažetak zapisnika)**

6. sjednicu Općinskog vijeća je otvorio Slaven Katičić, predsjedavajući Općinskog vijeća, i pozdravio prisutne: općinske vijećnike, općinskog načelnika, pomoćnike općinskog načelnika, izvjestioce, obrađivače, predstavnike medija i goste.

Predsjedavajući je zamolio da vijećnici prijave svoje prisustvo.

Vijećnici prisutni na sjednici:

Džemal Bećirhodžić (naknadno pristupio), Aldin Šljivo, Edin Aliefendić, Mejrema Purišević, Senad Alajbegović, Izudin Hrusto, Haris Veispahić, Adnan Ibrahimspahić, Amar Selimović, Safet Šahman, Muhamed Kubat – vijećnici- **SDA**

Semir Mušija, Rizah Haračić, Mirnes Merdić i Mugdin Gorak – vijećnici **SBB BiH**

Mirsad Tursum, Rešad Merdić, Fahrudin Buza, Adisa Čehajić i Zerina Kovač – vijećnici **S BiH**

Enes Piljug i Eldin Mijoč– vijećnici **SDP BiH**

Nusret Muslić i Sedmedin Amidić – vijećnici **DF**

Slaven Katičić i Ivica Petrović – vijećnici **HDZ BiH**

Elvedin Delić – vijećnik **A-SDA**

Mujo Fafulić – **nezavisni kandidat iz reda nacionalnih manjina.**

Odsutni vijećnik: Ahmed Begić – vijećnik **SDP BiH**

Predsjedavajući je konstatirao da su na sjednici u momentu prijave prisutno 26 vijećnika te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

Nermin Mandra, općinski načelnik

Ferdo Mijač, sekretar Općinskog vijeća

Enver Kusić, sekretar općinskog organa uprave

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice – po ovlaštenju

Džihad Berbić, pomoćnik općinskog načelnika za finansije

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Nurudin Hrusto, pomoćnik općinskog načelnika za civilnu zaštitu

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Zijad Neimarlija, direktor Zavoda za planiranje i izgradnju općine Kakanj

Izvjestioci, obrađivači, gosti

Mirnes Bajtarević – direktor JP „Grijanje“ d.o.o. Kakanj

Helmina Murtić – direktorica JU za predškolski odgoj i obrazovanje „Mladost“ Kakanj

Amila Spahić – predsjednica UO JU za predškolski odgoj i obrazovanje „Mladost“ Kakanj

Vahidin Topalović – komanadir Policijske stanice Kakanj

Međid Bajrić – predsjednik Komsije za označavanje i evidentiranje naseljenih mjesta, ulica, trgova i kućnih brojeva

Predstavnici medija:

NTV IC Kakanj

Radio Kakanj

„Kakanjske novine“

„Naša riječ“

„Kakanjlive“

„Kakanj-x“

„Kaportal“

Kratka saopćenja o radu sjednice i prethodnim pitanjima:

Predsjedavajući je rekao da je, u pripremi 6. redovne sjednice Općinskoga vijeća, Kolegij Vijeća je na 5. sjednici održanoj 22.03.2017. godine, pored utvrđivanja prijedloga dnevnog reda za današnju sjednicu Vijeća, razmatrao i k znanju primio Odgovor Zavoda za planiranje i izgradnju općine na Zaključak Kolegija Općinskog vijeća broj: 01/1-4-74-K/17 od 20.02.2017.godine, Informaciju Općinskog načelnika u vezi upozorenja teniskog kluba „TTT-GAME“ Kakanj, Inicijativu OO „Naša stranka“ Kakanj za organiziranje dežurne apoteke u krugu JU Dom zdravlja Kakanj i Inicijativu i prijedlog za finansiranje projekta „Dani pošumljavanja u Kaknju 2017“ Ekološkog pokreta gorana F BiH a prijedlog Privrednog savjeta Općine Kakanj za izradu strategije razvoja turizma općine Kakanj zaključkom prosljedio na dalje postupanje Službi za privredu, urbanizam i zaštitu okoline.

Usvajanje zapisnika sa 5. sjednice Općinskog vijeća

Predsjedavajući je zapisnik sa 5. sjednice Vijeća stavio na razmatranje. Pošto nije bilo prijavljenih diskutanata, predsjedavajući je nakon glasanja konstatirao da je isti usvojen sa 26 glasova za, niko protiv i niko uzdržan.

Komentari na dostavljene odgovore na vijećnička pitanja

Rizah Haračić: je rekao da je imao 2 vijećnička pitanja i da nije dobio odgovore na sva vijećnička pitanja. Dodao je da se prethodnim pitanjima obraćao raznim institucijama kako bi dobio odgovor o tačnom broju oboljelih od karcinoma na području općine Kakanj. Rekao je da je ukupan broj umrlih od karcinoma godišnje oko 500 te da neki ne ispunjavaju zakonsku obavezu i ne prijevaljuju oboljele tako da su podaci nepotpuni. Također, rekao je da zbirnog podatka o tačnom broju oboljelih nema niko te da je to svjesna namjera prikrivanja podataka. Istaknuo je da ovo pitanje nije političko i da se o ovim stvarima šuti, naročito zbog toga što se broj oboljelih ubrzano povećava u posljednje 3 godine. Najavio je da će tražiti da se na narednim sjednicama Vijeće izjasni o preventivnim mjerama kako bi se donekle ublažio ovaj trend rasta oboljelih od karcinoma. U vezi odgovora koji je dobio od TC Kakanj rekao je da je ovo vid informacije a ne odgovora na vijećničko pitanje jer u odgovoru nema podataka koji je tražio. Osvrnuo se i na rečenicu u kojoj se kaže da se TC vodi automatski monitoring polutanata što ništa ne znači jer bi mjerenja trebao da vodi nezavisan organ kao i kalibraciju mjernih instrumenata. U vezi konstatacije da se spaljuju samo gume promjera 16", rekao je da odgovorno tvrdi da ona nije tačna. Predložio je da se, ukoliko mišljenje na vijećničku inicijativu ili odgovor na pitanje ne sadrži informacije koje se traže, taj odgovor ili mišljenje ne dostavlja vijećniku. Ponovio je da bi se na Vijeću trebala razmatrati ova problematika s posebnim osvrtom na zagađivače, a naročito male koji svojim emisijama doprinose ionako lošoj slici kakanjskog zraka.

Predsjedavajući: je rekao da Stručna služba za poslove Općinskog vijeća ima zadatak prosljediti pristigla mišljenja i odgovore na vijećničke inicijative i pitanja vijećnicima i da ne može na sebe preuzeti takvu odgovornost.

Mirsad Tursum: je rekao da nije odgovarao na vijećnička pitanja pojedinačno a sada će dati zbirni odgovor na vijećnička pitanja koja uglavnom postavljaju vijećnici iz kluba vijećnika SBB a upućena su JU Dom zdravlja Kakanj. Dodao je da pojedinci govore o stvarima o kojima i ne znaju baš dovoljno i da preko ovih

pitanja žele poslati poruku TC Kakanj. Dodao je da kada neko kaže da je u Kaknju umrlo 500 ljudi godišnje to nisu istiniti podaci, već dezinformacija i širenje panike među građanstvo što bi trebalo sankcionirati. Dodao je da se iz svih ambulanti na području općine Kakanj karcinomi prijavljuju i da dijagnoza karcinoma nije jednostavan proces te da se često ti pacijenti upućuju u veće medicinske centre. Da bi se dijagnosticirao karcinom, treba da se urade patocistološki nalazi u tri različite ustanove, a 77 kojih je prijavljeno u Kaknju su samo očiti primjeri ove bolesti. Odgovorio je Semiru Mušiji u vezi pitanja o patronažnoj službi te dodao da bi u tom slučaju Dom zdravlja morao imati ugovor sa Zavodom i prema Plavoj knjizi normativa i standarda u zdravstvu Kakanj nema pravo na patronažnu službu. Patronažni tim postoji ali ne za porodilje, obzirom da one prilikom redovnih dolazaka u bolnicu dobiju upute. Dodao je da je Kakanj jedini grad koji ima porodilište koje finansira isključivo JU Dom zdravlja. U vezi inicijative Naše stranke da Dom zdravlja ustupi prostor apoteci sa radnim vremenom 24h u krugu bolnice, rekao je da na privatne subjekte ne može utjecati i da to nije nadležnost Doma zdravlja. U vezi pitanja o radnom vremenu rekao je da JU Dum zdravlja ima brojeve telefona i web-stranicu gdje se ta ista pitanja mogu postaviti. Također, dodao je da nema potrebe ići i anketirati uposlenike JU Doma zdravlja pa onda takva pitanja postavljati za govornicom. Istaknuo je primjer vijećnice Purišević koja je pitala prvo njega i kad je dobila usmeni odgovor, odustala je od pitanja. Poručio je vijećnicima da, ako imaju ozbiljna pitanja bez pretenzije za medijskim eksponiranjem, neka to pitanje postave direktoru i postavljaju pitanja o građanima bez zdravstvenog osiguranja i dežurstvu u ambulanti Brnjic.

Rizah Haračić: je rekao da su ovo po dnevnom redu komentari na dostavljane odgovore na vijećnička pitanja a vijećnik Tursum je izašao u svojstvu direktora JU Doma zdravlja. Osvrnuo se na kosnatataciju da je iznio lažan podatak i rekao da je iz ove ustanove dobio odgovor da je umrlih od karcinoma 270, 260 po godinama s tim da ostale podatke imaju i druge institucije a od Kantonalne bolnice Zenica dobio je odgovor u kojem se kaže da ostale institucije ne prijavljuju slučajeve. Dodao je da prema zbirnim podacima koje on ima taj podatak možda i nije 500 ali jest 400, ali suština je da nema institucije koja ima zbirne podatke.

Mirsad Tursum: je rekao da se ne želi raspravljati sa ljudima koji iznose krivo ali treba reći da je JU Dom zdravlja u odgovoru na vijećničko pitanje vijećnik Haračića iznio službeni podatak. Svi zbirni podaci nalaze se u institucijama za statistiku. Na kantonalnom nivou to je Institut za sigurnost hrane i javnog zdravstva. Svake godine dobije se i taj izvještaj koliko je kakvih oboljenja. 500 oboljelih od karcinoma je dezinformacija i nije jasno odakle ima takav podatak.

Semir Mušija: je rekao da nije imao namjeru komentirati odgovor na vijećničko pitanje i da je njegov izlazak za govornicu posljedica nekorektnog govora vijećnika Tursuma. Dodao je da je na prošloj sjednici Općinskog vijeća pokrenuo vijećničku inicijativu da se uvede praksa koja bi podrazujevala da u prvih 10 dana kada porodilja izađe iz porodilišta nju posjećuje babica, akušer-a/-ke. Dodao je da nije precizirao na koji način će se ova praksa implementirati obzirom da je svrha inicijative da porodilje poslije poroda imaju uslugu od svoje ustanove i jedan vid podrške na početku što je i pozitivna praksa općine Visoko. Rekao je da mu patroniziranje vijećnika Tursuma klubu vijećnika SBB nije jasno jer po toj logici vijećnici bi prvo morali imati dozvolu direktora ili nekog UO da postave pitanje. Nevažno je ko pitanja postavlja sve dok ona imaju dobru namjeru. Kako su se zbirno analizirala vijećnička pitanja kluba vijećnika SBB tako su se mogli i zbirno pogledati odgovori koje je JU Dom zdravlja dao koji su šturi i nose poruku između redova u smislu: Zašto se ova pitanja postavljaju? Na kraju je dodao da pitanja nisu išla u smjeru loše već dobre namjere.

Mirsad Tursum: je rekao da Kakanj, za razliku od gradova u okruženju, ima porodilište što je skup od 2 ginekologa, 6 akušerskih sestara i 4 pedijatrijske sestre. Gdje se potreba ukaže potreba, tj. indikacija koju ljekar konstatira, patronažna služba ide. Dodao je da vijećnici postavljaju pitanja na koja mogu dobiti odgovor jednim telefonskim pozivom, umjesto da pitaju ko će platiti prekoračenje esencijalne liste od 375.000KM ili na koji način se liječi 5.000 lica bez zdravstvenog osiguranja. U vezi magnetne rezonance, rekao je da zakonski Kakanj ne može imati magnetnu rezonancu ali može CT te predložio da se inicijative predlažu u tom smjeru.

Nusret Muslić: se osvrnuo na vijećničko pitanje u vezi prodaje općinske imovine u periodu od 2008-2016 te rekao da je dobio samo podatke o prodatim parcelama i dodao da ne može da vjeruje da Općina nema podatak o imovini koju je prodala. Dodao je dopunjava pitanje kako bi se dostavili i podaci o prodatim poslovnim prostorima i stanovima.

Komentari na dostavljena mišljenja na vijećničke inicijative:

Izudin Hrusto: je rekao da nije dobio odgovor ni mišljenje na vijećničko pitanje i inicijativu upućeno Vladi ZDK a isto tako odgovor nije dobio ni vijećnik Delić u vezi povećanja ograničenja brzine kod TE. Tražio je da se ista pitanja ponovo upute na adresu Vlade ZDK.

Safet Šahman: je podsjetio na inicijativu da se i seoski vodovodi urede kako bi i ruralno stanovništvo imalo kvalitetnu vodu. Osvrnuo se na izjašnjavanje Skupštine ZDK u vezi ove inicijative i zaključio da je ovakav ishod posljedica nedovoljnog razumijevanja namjere koju je imala ova inicijativa. Inicijativa je pokrenuta jer mnogo stanovništva pije nezdravu vodu, stoga bi trebalo da se na općinskom nivou formira pravni tim koji bi mogao djelovati u pogledu obezbjeđenja pitke vode za sve stanovnike općine Kakanj.

Enes Piljug: je rekao da je prošli put pokrenuo dvije vijećničke inicijative i da je na obje dobio negativno mišljenje Zavoda za planiranje i izgradnju općine Kakanj te da nije zadovoljan što se nije moglo iznaći sredstava za realizaciju makar jedne jer su obaprojekta već započeta.

Elvedin Delić: se zahvalio nadležnoj službi na pravovremenoj intervenciji na njegovu vijećničku inicijativu te najavio da će inicijativu precizirati.

Sedmedin Amidić: je podsjetio da je pokrenuo vijećničku inicijativu za postavljanje pješačkog mosta između MZ Halinovići i Nažbilj i da nikad nije dobio odgovor. Također, dodao je da je dobio mišljenje na vijećničku inicijativu u vezi sportskih manifestacija prilikom obilježavanja značajnih datuma u kojoj su samo navedeni profesionalni klubovi i njihove utakmice a on je prilikom pokretanja inicijative mislio na sportske manifestacije prilagođene svim uzrastima stanovništva na području općine Kakanj.

Vijećnička pitanja

Jasmin Mušanović: „Možete li mi detaljno dostaviti informaciju o broju (dozvoljenom) grla koja se mogu držati na privatnim posjedima, mislim na krupnu i sitnu stoku (krave, ovce, konji itd.) po glavi stanovnika i po zonama općine Kakanj.“

Rizah Haračić: 1. „Općina Kakanj - zašto je taj spisak studentskih stipendija. Mnogi me građani pitaju zašto je to tako. Na taj način se proizvodi sumnja a i onemogućava se mogućnost da se prijave oni koji su dali lažne podatke. U isto vrijeme se objavljuje spisak taksista.“ 2. „Porezna uprava i Agencija za rad i zapošljavanje – da se da ukupan broj zaposlenih sa područja općine Kakanj sa posebnim osvrtom na zadnjih 5 godina i to prema mjestu uplate (sjedište) i prema prebivalištu.“

Mirnes Merdić: 1. „Upućujem vijećničko pitanje Službi za imovinskopravne, geodetske poslove i katastar nekretnina a odnosi se na cijenu izdavanja građevinske dozvole individualnih stambenih objekata po m² i po zonama i koje su cijene urbanističke i upotrebne dozvole za izgradnju istih?“ 2. „Upućujem vijećničko pitanje Zavodu za planiranje i izgradnju kada se misli potpisati ugovor o izvođenju radova na održavanju postojeće javne rasvjete u gradu i mjesnim zajednicama, pošto je ugovor sa JP Elektroprivreda BiH d.d. Sarajevo, ZD RMU Kakanj d.o.o. Kakanj istekao sa 31.12.2016. godine.“

Eldin Mijoč: 1. „Ko je pozicija a ko opozicija u ovom Općinskom vijeću?“ 2. „Koliko je ukupno utrošeno sredstava u projekat stambenog zbrinjavanja Roma od 2012. godine. do 31.12.2016. godine te koliko od toga su sredstva izdvojena iz Budžeta Općine Kakanj? Koliko je ukupno sredstava planirano da se u navedenu namjenu utroši u toku 2017.godine te kolika je od toga obaveza Budžeta Općine Kakanj?“

Nusret Muslić: 1. „Pitanje se odnosi na industrijsku zonu i klizište prouzrokovano na istoj lokaciji. Kada se radi o industrijskoj zoni pitanje glasi: Da li je ista zona uređena po projektnoj dokumentaciji i u skladu sa istom dokumentacijom? Da li su sve oborinske i dr. vode uvedne u sistem i izvedene van industrijske zone te u skladu sa do sada urađenim pregledima i sanacionim radovima? Je li ustanovljena moguća odgovornost projektanta, izvođača radova kao i privrednih subjekata koji su izgradili svoje objekte na industrijskoj zoni i da li su objekti u okvirima dodjeljenih parcela?“ 2. „U cilju sprečavanja i prevencije kada su u pitanju klizišta kao i moguće druge nepogode – poplave i sl. Postoji li mogućnost da se imenuje stručni tim koji bi mapirao na području općine Kakanj sva potencijalna klizišta, uska grla rijeka i potoka i druga moguća mjesta gdje prijete opasnost po živote i imovinu građana, kako bi, nakon mapiranja ovakvih

potencijalnih opasnosti, nadležne službe mogle preventivno djelovati?“ **3.** „Koliko je Općina Kakanj prodala stanova, poslovnih prostora i garaža u vremenskom periodu od 2008-2016. godine?“

Sedmedin Amidić: **1.** „U kojoj fazi se nalazi izgradnja potpornog zida, uklanjanje urušenog materijala i leševa životinja u naselju Bare, kako bi se stvorili životni uslovi, te preventivnim djelovanjem otklonila i najmanja mogućnost ponavljanja tragedije? Također, time bi se spriječilo širenje zaraznih bolesti koje su još uvijek izgledne i moguće. Pitanje upućujem Službi za privredu, urbanizam i zaštitu okoline.“ **2.** „Vijećničko pitanje upućujem inspekciji Općine Kakanj, a odnosi se na područje naselje Ivnica u kojem se nalazi privatna piličara čiji je kapacitet 15000 pilića. Mještani su u nekoliko navrata tražili inspekcijску podršku zbog nesošljivih mirisa na tom lokalitetu. Pitanje se odnosi na to šta je poduzela općinska inspekcija oko navedenog problema. Prema informacijama mještana vlasnik je upućivao i prijete mještanima koji su se žalili i vršili prijave.“

Rešad Merdić: **1.** „U čijoj je nadležnosti održavanje i sanacija na cementarskom mostu i kada se planira sanirati postojeće oštećenje? Pitanje upućujem službi koja je nadležna za održavanje putne infrastrukture.“ **2.** „Nadležnoj službi za klizišta i elementarne nepogode da mi da odgovor o uzrocima nastanka klizišta Karaula i da li je procijenjena vrijednost za sanaciju istog.“

Semir Mušija: **1.** „Kojim propisom je zabranjeno ugostiteljskim objektima organizovanje live-svirki? Pitanje je postavljeno iz razloga što trenutno u Kaknju nijedan kafić ne može organizovati svirku uživo.“ **2.** „Da li u bilo kojoj službi Općine Kakanj kao organa lokalne samouprave ima zaposlen geolog?“

Slaven Katičić: „Dana 17.03.2016. godine u Poljanima, općina Kakanj zapaljena je obnovljena povratnička kuća u vlasništvu Mije Šušnja. Prema raspoloživim informacijama, nakon provedenih operativno kriminalističkim metoda, privedena je osoba za koju je postojala osnovana sumnja da je počinitelj navedenog kaznenog djela, te je nad istim provedena kriminalistička obrada. S obzirom da je protekla godina dana od navedenog kaznenog djela, nadležnoj Policijskoj stanici Kakanj i Tužiteljstvu ZE-DO kantona, upućujem pitanje: „Što je poduzeto po navedenom kaznenom djelu, kako je isto okvalificirano, te u kojoj se fazi nalazi navedeni predmet?““

Adisa Čehajić: „Poštovani, kad je planirano izvršiti sanaciju i asfaltiranje puta koji je oštećen u elementarnim nepogodama iz 2014.god. na relaciji D.Brdo – OŠ „Rešad Kadić“ kao i čišćenje korita rijeke Ribnice na tom dijelu gdje se desio odron? Radi se o dvije dionice puta; kod mosta koji je bio poplavljen i dionica u blizini ambulante.“

Izudin Hrusto: „Postavljam pitanje nadležnom ministarstvu Zeničko-dobojskog kantona da li ima u planu i programu da rekonstruiše ogradu na mostu u MZ Čatići kod benzinske pumpe „Kameni-petrol“ i da li je moguće proširenje istog tog mosta?“

Safet Šahman: „Poštovani! Pri pokušaju uređenja načina korištenja i zdravstvene ispravnosti mjesnih vodovoda i odbijanja inicijative OV Kakanj postavljam pitanje: Koliko hiljada građana svakodnevno konzumira zdravstveno neispravnu vodu. Isključivo se radi o seoskom stanovništvu. Imate li podatke koliko godišnje oboli trajno građana zbog iste? Koliko košta 1 dijalizni pacijent na godišnjem nivou? Zašto nije dozvoljeno da općinski vodni inspektor ne može intervenisati prilikom prijave zloupotrebe vode za piće? Ko koga da tuži kad se ne zna ni ima li naseljeno mjesto odbor za vodu? Ako neko koristi vodu zajedničku i u svrhe navodnjavanja, hoćemo li čekati tužbu i odluku suda i u međuvremenu živjeti bez vode na česmama?“

Vijećničke inicijative:

Ivica Petrović: je rekao da je sat vremena, koliko je predviđeno za vijećnička pitanja i inicijative, istekao i da treba upozoriti vijećnike da govornicu ne zloupotrebjavaju.

Predsjedavajući: je rekao da će ubuduće vijećnici morati voditi računa o vremenu predviđenom za vijećnička pitanja i inicijative te predložio da vijećnici iskoriste i pravo da pismeno predaju inicijativu.

Enes Piljug: „Pokrećem vijećničku inicijativu da se u naselju Drijen, tačnije Borovima napravi manje odmaralište. Radi se o pogodnom mjestu za izgradnju manjeg odmarališta za stanovništvo Kaknja. Mjesto

Borovi na Drijenu su udaljeni 10 km od centra Kaknja, nadmorska visina je 890 metara, tako da stanovništvo općine Kakanj može brže, lakše i jeftinije doći do čistog zraka i prirode.“

Sedmedin Amidić: „Da se utvrdi ko je nadležan da zaustavi iskopine (bušotine) na kamenolomu Greben, te da se zaustavi iskopavanje.“

Rizah Haračić: 1. „Pokrećem vijećničku inicijativu Općini Kakanj da se izvrši snimanje terena i sanacija klizišta u MZ Bičer koje bi moglo ugroziti nekoliko kuća. Pomenuto klizište aktivno je već nekoliko godina a u zadnje vrijeme zbog podzemnih voda pokrenulo se na nekoliko mjesta te oštetilo dio puta u mjestu Pozamet. Dvije kuće zbog kretanja klizišta su preventivno iseljene a građani su ovaj slučaj već prijavili u Općinu Kakanj.“ 2. „Pokrećem vijećničku inicijativu da se dostave na uvid okolinska dozvola TC Kakanj na uvid svim vijećnicima kao i da se dostavi elaborat o eventualnoj štetnosti spaljivanja guma na zdravlje stanovništva, kao i da se dostavi saglasnost lokalne zajednice ako je bila javna rasprava, da se daju ugovori o isporuci guma (količine, od kog datuma su dobili okolinsku dozvolu i do kada. U dosadašnjem odgovoru na vijećnička pitanja dobio sam paušalan odgovor tj. tražim da se da broj okolinske dozvole, da se da elaborat koji tačno pokazuje da spaljivanje ne utiče na zdravlje stanovništva i da se daju saglasnosti lokalne zajednice na osnovu javne rasprave ako ih ima a na osnovu javne rasprave koja je održana (navesti datum) nekog dana i navesti prisutne na javnoj raspravi.“

Izudin Hrusto: 1. „Pokrećem vijećničku inicijativu za dopunu postojećeg parking prostora za parking mjesta za bicikle na prostoru oko Općine Kakanj.“ 2. „Za promjenu ograničenja brzine kretanja vozila na regionalnom putu Kakanj - Visoko, i to na dijelu od propusta za Banjevac do kapije Termoelektrane Kakanj i od parkinga Termoelektrane do autobuske stanice Papratnica. Pravni osnov za donošenje akta: Na navedenoj dionici puta maksimalna brzina kretanja vozila je 40 km/h. Traži se izmjena i povećanje maksimalne brzine kretanja (automobila) vozila na 60 km/h. Razlozi i objašnjenje podnesene inicijative: Nekad na ovoj dionici puta se kretalo dosta djece koja su išla u školu, zatim građani koji su išli u ambulantu koja se nalazila u krugu Termoelektrane kao i veliki broj kamiona koji je dovlačio ugalj potreban Termoelektrani. Još prije nije bilo trotoara za pješake. Sada trenutno od svega gore navedenog je suprotno. Ima trotoar, ambulanta se iselila na drugu lokaciju (u prostorije škole), djeca idu u OŠ „Omer Mušić“ Brežani, kamioni ne dovlače ugalj, zašto vjerujem da je dovoljno opravdanje i dobar razlog za usvajanje inicijative. Angažiranje finansijskih sredstava: Nešto malo, minimalno od 300,00 KM do 400,00KM.“

Semir Mušija: 1. „Pokrećem vijećničku inicijativu koja se odnosi na izgradnju trotoara kod objekta slastičarna „Egipat“ i izgradnju trotoara do Ulice branilaca prema bivšem objektu „Njam Njam“. Razlozi i objašnjenje podnesene inicijative: Sigurnost pješaka kao kategorije najugroženijih učesnika saobraćaja. Angažiranje finansijskih sredstava: dvadeset hiljada KM od iznosa planiranog za rekonstrukciju glavne saobraćajnice.“ 2. „Pokrećem vijećničku inicijativu da se na raskrsnicu Bičer-Dumanac postavi ogledalo u cilju bolje preglednosti učesnika u saobraćaju.“

Elvedin Delić: „Na inicijativu broj: 01/1-5-122/17 od 27.02.2017. godine, podnosim dopunu koja glasi:“Da nadležna služba odnosno inspeksijski organ dobro utvrdi ulaz u zgradu (podrum) i da se postave željezni stubići.“

Jasmin Mušanović: „Molim da se u narednom periodu riješi pitanje korita rijeke Zgošće, a kod Šehidskog mosta kako ne bi došlo do neželjenih posljedica, a u periodu velikih kiša. Ovu inicijativu sam pokrenuo 2016. godine na programe Opštine. Molio bih da se stupi u kontakte sa mještanima i predsjednikom mjesne zajednice Kakanj II.“

Nusret Muslić: 1. „Inicijativa se odnosi na JU Dom zdravlja Kakanj. Da se u narednom periodu pacijenti oslobode plaćanja troškova pregleda na specijalističkim aparatima, ultrazvučni aparati, kolor dopler i dr. aparati koji su donacijama i drugim dobrotvornim priložima nabavljeni i ustupljeni Domu zdravlja. Razlozi i objašnjenje podnesene inicijative: Mi u Demokratskoj fronti mišljenja smo da su donatori i drugi sponzori koji su pomogli da se ova oprema nabavi, imali namjeru da našim građanima-pacijentima olakšaju liječenja i odlazak u druge gradove i ustanove na obavljanje ovih pregleda. Imajući u vidu da veliki broj pacijenata nije u mogućnosti platiti troškove ovih pregleda i da mnogi nakon upute ne obave ove preglede, smatramo da bi ovaj dio neplaćanja ovih pregleda uveliko pomogli i olakšali pacijentima koji trebaju ovakve vidove specijalističkih pregleda.“ 2. „Pokrećem vijećničku inicijativu prema budućim organizacionim odborima i

moderatorima koji su zaduženi za protokolarne aktivnosti obilježavanja značajnih datuma da se protokolarno riješe mjesta sa kojih se kreće sa polaganjem cvijeća, da moderator u svom uvodnom izlaganju naglasi redoslijed polaganja cvijeća, te da se nakon svih polaganja cvijeća zajednički odaje počast i uči Fatihu. Da se prilikom svečanih akademija a posebno onih koje se tiču odbrambeno-oslobodilačkih ratova, u prvim redovima obezbijede mjesta za porodice poginulih boraca RVI i DB-e. Razlozi i objašnjenje podnesene inicijative: Velike gužve i guranja delegacija koje polažu cvijeće. Sa strane kad se posmatra sve ovo izgleda neorganizovano-neozbiljno prema mjestu i žrtvama zbog kojih se tu nalazimo kao i zbog građana koji su došli svojim prisustvom da uveličaju i daju počast. Kad se tiče svečanih akademija, ne može da se ne primijeti da se u prvim redovima nalaze oni koji su u ratu bili u zadnjim a oni koji su bili prvi na ovim događajima su u zadnjim redovima.“

Utvrđivanje dnevnog reda

Predsjedavajući je za sjednicu predložio dnevni red (PO POZIVU) koji je usuglašen na sjednici Kolegija Općinskoga vijeća održanoj 22.03.2017. godine. Dodao je da je u međuvremenu pristigla Informacija o radu Komisije za dodjelu interventnih sredstava za pomoć te predložio da se ista uvrsti kao 23. tačka dnevnog reda a kao 2. tačka dnevnog reda prijedlog odluke o dopuni Odluke o izvršavanju Budžeta Općine Kakanj za 2017.godinu.

U diskusiji o dnevnom redu nije niko učestvovao pa je predsjedavajući dnevni red stavio na glasanje i isti je usvojen sa 29 glasova za, niko protiv i niko uzdržan.

Usvojeni dnevni red:

1. Prijedlog izmjena i dopuna Budžeta Općine Kakanj za 2017. godinu
2. Prijedlog odluke o dopuni Odluke o izvršavanju Budžeta Općine Kakanj za 2017. godinu
3. Prijedlog izmjena i dopuna Programa utroška namjenskih sredstava od prihoda ostvarenih radom termoelektrana za 2017. godinu
4. Prijedlog odluke o izmjeni Odluke o provođenju Prostornog plana općine Kakanj za period 2010-2030.
5. Prijedlog odluke o izmjeni Odluke o provođenju Urbanističkog plana Kakanja 2011-2026.
6. Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017.godinu
7. Prijedlog odluke o davanju saglasnosti za utvrđivanje namjene mikrolokaliteta
8. Prijedlog odluke o visini konačne građevinske cijene iz prethodne godine po m² korisne stambene površine na području općine Kakanj
9. Izvještaj o ostvarivanju politike jedinice lokalne samouprave i aktivnostima Općinskog načelnika za 2016. godinu
10. Izvještaj o realizaciji Okvirnog programa rada Općinskog vijeća za 2016. godinu
11. Izvještaj o radu Općinskog pravobranilaštva za 2016. godinu
12. Izvještaj o provedenoj javnoj raspravi o nacrtima odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj i odluke o utvrđivanju registra naziva ulica, trgova i mostova na području općine Kakanj
13. Prijedlog odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj
14. Prijedlog odluke o utvrđivanju registra naziva ulica, trgova i mostova na području općine Kakanj
15. Prijedlog odluke o postupku registracije i načinu vođenja Registra mjesnih zajednica Općine Kakanj sa priložima
16. Prijedlog odluke o dopunama Odluke o administrativnim taksama Općine Kakanj
17. Prijedlog odluke o davanju saglasnosti za izgradnju sportske dvorane za potrebe kakanjskog sporta i za potrebe STŠ „Kemal Kapetanović“
18. Prijedlog odluke o dopuni Odluke o utvrđivanju javnog interesa u svrhu izgradnje kanalizacionog sistema u naselju Tršće
19. Prijedlog odluke o dodjeli petnaestoaprilskih priznanja Općine Kakanj
20. Utvrđivanje Prijedloga upisnog/gravitacionog područja osnovnih škola u općini Kakanj
21. Informacija o stanju sigurnosti na području Policijske stanice Kakanj za 2016. godinu
22. Izvještaj o finansijskom poslovanju JU za predškolski odgoj i obrazovanje „Mladost“ Kakanj za 2016. godinu

23. Informacija o radu Komisije za dodjelu interventnih sredstava za pomoć

Na prijedlog kluba vijećnika DF uslijedila je pauza u radu Vijeća od 15'.

Tačka 1.

Prijedlog izmjena i dopuna Budžeta Općine Kakanj za 2017. godinu

Izvjestilac je bio Džihad Berbić, pomoćnik općinskog načelnika.

Džihad Berbić: je rekao da su se u roku od 3 mjeseca desile promjene koje su uvjetovale ove izmjene i dopune Budžeta Općine Kakanj za 2017.godinu (općinske odluke o prodaji imovine, odluke viših organa vlasti kojima se dodjeljuju sredstva Općini Kakanj po raznim osnovama, klizišta na površinskom kopu RMU Kakanj i u Malješu koja su utjecala na promjene programa Službe civilne zaštite). Budžet će sa ovim izmjenama sa 22.920.000KM biti 26.090.000KM. Prihodi od prodaje imovine (prodaja krovne etaže CC1) u iznosu od 2.083.000KM (po procijenjenoj vrijednosti), povećanje naknade od prihoda TE za 80.000KM, primljeni transferi od Ministarstva civilnih poslova BiH za izgradnju romskih kuća 100.000KM, od Fonda za zaštitu okoline 100.000KM za kanalizacioni sistem u slivu Trstionice, grantovi iz ZDK za vodne naknade se povećavaju u iznosu već ranije usvojenih programa. Ove prihode prate rashodi koji će, obzirom da su sredstva namjenska, pratiti projekte a prihod od prodaje krovne etaže CC1 i grant ZDK će se usmjeriti na izgradnju sportske dvorane u Kakanju. Isto tako postoje rashodi koji se troše ubrzanom dinamikom kao što su interventna sredstva za pomoć u liječenju. Osim ovih prijedloga u materijalu kojima je vijećnicima dostavljen predlaže se i transfer Sindikatu Rudstroja – 10.000KM – za ostvarivanje doprinosa za nezaposlenost radi naknade sa Biroa za radnike, transfer UG Penzionera/umirovljenika općine Kakanj za najugroženije kategorije ove populacije i 3.000KM Rudarskoj glazbi. Na prihodovnoj strani će se povećati prihodi usluga pravnim licima, kod 722612.

U diskusiji su učestvovali: Izudin Hrusto, Haris Veispahić, Semir Mušija, Nusret Muslić, Rizah Haračić i Edin Aliefendić.

Izudin Hrusto: je ispred kluba vijećnika SDA rekao da je za općinske stipendije konkurisalo 174 kandidata, a stipendiju ostvarilo 156 studenata. Prijedlog ovog kluba je da 18 studenata dobije stipendiju, tj da se sredstva u ovom rebalnsu osiguraju za tu namjenu, ukoliko ne ostvare pravo na kantonalnom javnom pozivu za stipendiranje.

Rešad Zaimović: je rekao da je trenutno u toku konkurs Ministarstva obrazovanja ZDK te da bi bilo dobro da svi kakanjski studenti, koji nisu ostvarili općinsku stipendiju, predaju aplikaciju za kantonalnu. Ukoliko bi se desilo da ti studenti ne dobiju ni kantonalnu stipendiju, onda bi se tražila rješenja za njih na općinskom nivou. Pošto se ne zna koliko će to broj studenata biti, najbolje je ovaj prijedlog ostaviti za naredne izmjene i dopune Budžeta Općine Kakanj.

Haris Veispahić: je rekao da je suština da svi studenti dobiju stipendiju i da je prijedlog kluba SDA i bio da se ovi studenti prvo prijave na kantonalnu, a ukoliko ju ne dobiju, da im se dodijeli općinska a sredstva za tu namjenu osiguraju u narednim izmjenama i dopunama Budžeta Općine Kakanj za 2017.godinu.

Semir Mušija: je istaknuo činjenicu da je spisak studenata tajan ali svi znaju ko ju je dobio. Dodao je da je klub vijećnika SBB u toku javne rasprave o nacrtu budžeta za 2017.godinu predložio da se osiguraju sredstva za ovu namjenu kako bi svi studenti imali stipendiju. Stoga će ovaj klub podržati prijedlog kluba vijećnika SDA.

Općinski načelnik: je uočio da se već dva puta za govornicom govori o tajnim spiskovima te rekao da se ne radi o prikriivanju podataka, obzirom na raniji trend općinske administracije da sva socijalna davanja, pomoći i stipendije transparentno objavi. Međutim, Zakonom o zaštiti ličnih podataka zaštićene su socijalne kategorije, tako da se ni utrošak tekuće budžetske rezerve sa spiskom socijalnih pomoći neće objavljivati. To ne znači da su ti podaci tajni jer svako od kandidata koji su prijavljeni na konkurs ima pravo uvida u spisak, svoju dokumentaciju kao i dokumentaciju drugih kandidata koji su ostvarili ista prava, kao i ostali građani preko Zakona o slobodi pristupa informacijama. Suština je da se ti podaci više ne mogu objavljivati ali nisu tajni. Dodao je da mu ova praksa nije favorit obzirom da je ranija imala snagu transparentnosti da

kandidati reagiraju na nepravilnosti i nekorektnost drugih kandidata. Predložio je da uvjet općinske stipendije za ovih 18 studenata bude dokaz da su aplicirali na kantonalni konkurs.

Nusret Muslić: je tražio pojašnjenja u vezi rashodovne strane, konkretno povećanje stavki: Izdaci za tekuće održavanje (index 129%), Izdaci osiguranja, bankovnih usluga i usluga platnog prometa (index 236%), Kapitalni transferi (index 161%). Predložio je da se transfer za Zemaljski muzej umanju na 2.000KM a 15.000KM preusmjeri na transfer za UG Penzionera ili interventna sredstva za pomoć u liječenju.

Rizah Haračić: se zahvalio načelniku na pojašnjenju te dodao da je osnovna namjera prijedloga kluba SBB bila transparentnost te da će ovaj klub podržati ovaj prijedlog izmjena i dopuna Budžeta.

Edin Aliefendić: je sugerirao da se zauzme stav u vezi interventnih sredstava za pomoć obzirom da je Komisija konstatirala da sredstava više nema.

Džihad Berbić: je rekao da su to sumarni procenti a do njih je došlo zbog investicija koje radi Zavod, obzirom da je to posebna budžetska organizacija i zbog sintetike na ekonomskim kodovima došlo je do ovakvih procentualnih iznosa. U vezi interventnih sredstava za pomoć rekao je da je dinamika trošenja bila ubrzana, a sada nema prostora za povećanje te stavke. U vezi amandmana da se umanju transfer za Zemaljski muzej rekao je da je Općina popisnica Protokola na državnom nivou i ima obavezu istog se pridržavati.

Haris Veispahić: je upitao da li se rashodovna stavka Drugi transferi – Izvršenja sudskih presuda i rješenja o izvršenju treba naći i kod javnih ustanova koje su ušle u trezor.

Džihad Berbić: je rekao da JU i u trezoru zadržavaju svojstvo pravnog lica i njihova sudska izvršenja su u njihovom organizacionom dijelu i njihova obaveza.

Predsjedavajući je prijedlog izmjena i dopuna Budžeta Općine Kakanj za 2017.godinu stavio na glasanje i nakon glasanja konstatirao da je isti usvojen sa 24 glasa za, 4 protiv i niko uzdržan.

Tačka 2.

Prijedlog odluke o dopuni Odluke o izvršavanju Budžeta Općine Kakanj za 2017. godinu

Izjavitelj je bio Džihad Berbić, pomoćnik općinskog načelnika.

U diskusiji je učestvovao Ivica Petrović.

Ivica Petrović: je rekao da osnovica plaće nije ista u posljednjih 6-7 godina te da bi, obzirom na nivo discipline i rada u organu uprave, trebala biti veća.

Predsjedavajući je prijedlog odluke o dopuni Odluke o izvršavanju Budžeta Općine Kakanj za 2017. godinu stavio na glasanje i nakon glasanja konstatirao da je isti usvojen sa 25 glasa za, 4 glasa protiv i niko uzdržan.

Tačka 3.

Prijedlog izmjena i dopuna Programa utroška namjenskih sredstava od prihoda ostvarenih radom termoelektrana za 2017. godinu

Izjavitelj je bio Džihad Berbić, pomoćnik općinskog načelnika

U diskusiji je učestvovao Enes Piljug.

Enes Piljug: je rekao da traži tačnu informaciju o klizištu u Malješu, te upitao koji su uzroci klizišta, šta se trenutno radi i kada se očekuje završetak sanacije klizišta kako bi građani općine Kakanj bili upoznati sa poduzetim mjerama.

Nurudin Hrusto: je kazao da je klizište u Malješu prijavljeno 9. marta 2017. godine u jutarnjim satima, gdje je Služba civilne zaštite odmah po saznanju izašla na mjesto događaja. Ubrzo nakon obilaska mjesta

dogadaja, utvrđen je sigurnosni rizik za stambene objekte ispod, sazvana vanredna sjednica Općinskog štaba civilne zaštite Kakanj, zatim je proglašeno stanje prirodne nesreće na ograničenom području tog dijela naselja. U daljem toku svog izlaganja rekao je da je evakuisano 11 stambenih objekata od kojih su dva bila nenastanjena i 50 članova domaćinstava iz 9 nastanjenih objekata. Također je rekao da je na sjednici Općinskog štaba donesena odluka o finansijskoj pomoći porodicama pogođenim ovim klizištem u iznosu od 500 KM (9 stambenih objekata, 13 domaćinstava). Istakao je da su, paralelno sa gore navedenim aktivnostima, poduzete i druge mjere, te da je isti dan formiran stručni tim, pozvan, geolog Federalnog geološkog zavoda, Vedad Demir koji je član stručnog tima i daje preporuke o poduzimanju svih aktivnosti. Pored provođenja hitnih mjera na rasterećenju klizišta urađen je i drenažni sistem. U zadnjih 7-8 dana klizište se zaustavilo, postavljeni su reperi, vršeno je svakodnevno mjerenje u početku i dva puta dnevno, te zadnja mjerenja pokazuju da je došlo do smirenja klizišta. Uporedo sa svim aktivnostima na terenu radi se i projektna dokumentacija, a jedan od projektnih zadataka je izgradnja potpornog zida. U daljem toku aktivnosti treba pažnju posvetiti povratku porodica u svoje domove, a otkrivanje uzroka ostaviti stručnim osobama. Na kraju je rekao da je procjena dosadašnjih radova i radova koji se planiraju u narednom periodu u vrijednosti od oko 400.000KM što će se dijelom finansirati iz Budžeta Općine a dijelom sa viših nivoa. Naglasio je da je Općinski štab civilne zaštite Kakanj u stalnom kontaktu sa stanovništvom pogođenim ovim klizištem tako da oni u svakom trenutku imaju sve informacije.

Predsjedavajući je prijedlog izmjena i dopuna Programa utroška namjenskih sredstava od prihoda ostvarenih radom termoelektrana za 2017. godinu stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

Tačka 4.

Prijedlog odluke o izmjeni Odluke o provođenju Prostornog plana općine Kakanj za period 2010-2030.

Izjavitelj je bio Mirza Fazlić, pomoćnik općinskog načelnika.

Pošto nije bilo prijavljenih za raspravu predsjedavajući je prijedlog odluke o izmjeni Odluke o provođenju Prostornog plana općine Kakanj za period 2010-2030. stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

Tačka 5.

Prijedlog odluke o izmjeni Odluke o provođenju Urbanističkog plana općine Kakanj za period 2011-2026.

Po ovoj tački dnevnog reda nije bilo rasprave pa je predsjedavajući prijedlog odluke o izmjeni Odluke o provođenju Prostornog plana općine Kakanj za period 2011-2026. stavio na glasanje i nakon glasanja konstatirao da je isti usvojen sa 27 glasova za, niko protiv i niko uzdržan.

Tačka 6.

Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017. godinu

Izjavitelj je bio Mirza Fazlić, pomoćnik općinskog načelnika.

Pošto nije bilo prijavljenih za diskusiju, predsjedavajući je prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017. godinu stavio na glasanje i nakon glasanja je konstatirao da je isti usvojen sa 28 glasova za, niko protiv i niko uzdržan.

Tačka 7.

Prijedlog odluke o davanju saglasnosti za utvrđivanje namjene mikrolokality

Pošto nije bilo prijavljenih za raspravu, predsjedavajući je prijedlog odluke o davanju saglasnosti za utvrđivanje namjene mikrolokality stavio na glasanje i nakon glasanja konstatirao da je isti usvojen sa 24 glasa za, niko protiv i 4 uzdržana.

Tačka 8.

Prijedlog odluke o visini konačne građevinske cijene iz prethodne godine po m² korisne stambene površine na području općine Kakanj

Kako nije bilo prijavljenih za raspravu, predsjedavajući je prijedlog odluke o visini konačne građevinske cijene iz prethodne godine po m² korisne stambene površine na području općine Kakanj stavio na glasanje i nakon glasanja konstatirao da je isti usvojen sa 26 glasova za, niko protiv i 2 uzdržana.

Tačka 9.

Izveštaj o ostvarivanju politike jedinice lokalne samouprave i aktivnostima Općinskog načelnika za 2016. godinu

Pošto nije bilo prijavljenih za raspravu, predsjedavajući je Izveštaj o ostvarivanju politike jedinice lokalne samouprave i aktivnostima Općinskog načelnika za 2016. godinu stavio na glasanje i nakon glasanja konstatirao da je isti usvojen sa 25 glasova za, 4 protiv i niko uzdržan.

Tačka 10.

Izveštaj o realizaciji Okvirnog programa rada Općinskog vijeća za 2016. godinu

Pošto nije bilo prijavljenih za raspravu, predsjedavajući je Izveštaj o realizaciji Okvirnog programa rada Općinskog vijeća za 2016. godinu stavio na glasanje i nakon glasanja konstatirao da je isti usvojen sa 25 glasova za, 4 protiv i niko uzdržan.

Tačka 11.

Izveštaj o radu Općinskog pravobranilaštva za 2016. godinu

Pošto nije bilo prijavljenih za raspravu, predsjedavajući Izveštaj o radu Općinskog pravobranilaštva za 2016. godinu stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

Tačka 12.

Izveštaj o provedenoj javnoj raspravi o nacrtima odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj i odluke o utvrđivanju registra naziva ulica, trgova i mostova na području općine Kakanj

Izjavitelj je bio Međid Bajrić, predsjednik Komisije za označavanje i evidentiranje naseljenih mjesta, ulica, trgova i kućnih brojeva.

Pošto nije bilo prijavljenih za raspravu, predsjedavajući je Izveštaj o provedenoj javnoj raspravi o nacrtima odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj i odluke o utvrđivanju registra naziva ulica, trgova i mostova na području općine Kakanj stavio na glasanje i nakon glasanja konstatirao da je isti usvojen sa 26 glasova za, 2 protiv i niko uzdržan.

Tačka 13.

Prijedlog odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj

Tačka 14.

Prijedlog odluke o utvrđivanju registra naziva ulica, trgova i mostova na području općine Kakanj

Predsjedavajući je na prijedlog kluba SDA objedinio raspravu o tačkama 13. i 14. s tim da će se Vijeće izjašnjavati pojedinačno o svakoj.

Izjavitelj je bio Međid Bajrić, predsjednik Komisije za označavanje i evidentiranje naseljenih mjesta, ulica, trgova i kućnih brojeva.

U diskusiji su učestvovali: Slaven Katičić, Safet Šahman, Edin Aliefendić, Haris Veispahić i Ivica Petrović.

Slaven Katičić: je rekao da ima dilemu da li je Općinsko vijeće nadležno da utvrđuje nova naseljena mjesta ili je to nadležnost Federalnog organa uprave te dodao da ne bi bilo dobro da se tu pogriješi. Predložio je da se, ukoliko Općinsko vijeće nije nadležno da utvrđuje naseljena mjesta, zaključkom ili inicijativom Vijeće obrati nadležnom organu a prema zakonskoj regulativi za ovu oblast. Dodao je da podržava ovakav prijedlog odluke i što se odustalo od brisanja pojedinih dijelova naseljenih mjesta. U vezi prijedloga odluke o utvrđivanju registra naziva ulica, trgova i mostova na području općine Kakanj iznio je mišljenje da treba provesti javnu raspravu te da Općinsko vijeće formira komisiju sastavljenu od predstavnika Općinskog vijeća koja bi ponudila jedan kompletan registar. Klub vijećnika HDZ-a BiH ne može podržati ovakav registar, ali da ima volje da se ovaj problem cjelovito riješi uvažavajući sve specifičnosti i različitosti. Predložio je da se na ovoj sjednici formira komisija kojoj će se dati rok do kada ona mora predložiti kompletan registar.

Safet Šahman: je rekao da je ranije predlagao da se dâ naziv novom naseljenom mjestu koje se pruža dolinom rijeke Ribnice. Ukazao je na problem koji će nastati u fazi numerisanja u Hodžićima, Varalićima, Krševcu i dr. te izrazio nadu da će Općinsko vijeće uvažiti i razmotriti inicijativu da se imenuje naseljeno mjesto od oko 41-42 domaćinstva naseljenih dolinom rijeke Ribnice.

Edin Aliefendić: je iskoristio priliku da čestita Općini Kakanj što je uredila ovu oblast te iskoristila potencijal volontera. Predložio je da se u tački 1. u tabeli pod rednim brojem 37. mjesna zajednica Zgošća, naseljeno mjesto Zgošća doda i dio naseljenog mjesta Aliefendići.

Haris Veispahić: se pridružio čestitkama Komisiji i Međidu Bajriću i rekao da će klub vijećnika SDA-a podržati ovaj set odluka jer je to nužno u ovom trenutku. Predložio je da se formira radna grupa ili tijelo koje će biti sastavljeno od predstavnika svih političkih partija koje participiraju u Općinskom vijeću kako bi i nedostajecih 16 lokacija dobile naziv. Također, ova radna grupa može predložiti i izmjene postojećih naziva. Komisija se može imenovati na narednoj sjednici.

Ivica Petrović: je predložio da u naseljenom mjestu Pope doda dio naseljenog mjesta Lozančići i da se u naseljenom mjestu Čatići dodaju dijelovi naseljenih mjesta Nevjestino Selo, Grot, Čimen i Mlinčić.

Slaven Katičić: je rekao da uvažava argumente vijećnika Veispahića uz prijedlog da se komisija imenuje na ovoj sjednici bez odgađanja za narednu sjednicu.

Međid Bajrić: je rekao da nema zapreke da se prihvate prijedlozi koji se tiču dijelova naseljenih mjesta. Za evidenciju naseljenih mjesta i dijelova naseljenih mjesta koristio se sistematski spisak naseljenih mjesta i dijelova naseljenih mjesta objavljen u „Službenim novinama SR BiH“ iz 1990. godine. U vezi prijedloga vijećnika Safeta Šahmana rekao je da je navedeni zaselak obuhvaćen naseljenim mjestom Varalići. Također, pojasnio je da je Komisija u vezi registra naziva ulica izvršila inventuru dosadašnjih odluka nadležnih tijela Općine Kakanj kada je u pitanju određivanje naziva ulica i da je to trenutno stanje na području općine Kakanj.

Haris Veispahić: je pojasnio da imenovanje komisije iziskuje određeni senzibilitet u smislu same tematike o kojoj se radi i da bi bolje bilo neishitreno ulaziti u realizaciju jednog ovakvog poduhvata. Dodao je da smatra da je Vijeće dovoljno fleksibilno da formira komisiju danas sa zaključkom kojim bi političke partije Općinskog vijeća u narednih 7-10 dana dostavile ime osobe koja će ući u tu komisiju.

Slaven Katičić: je rekao da klub vijećnika HDZ-a BiH nije ni za parcijalna ni za izhitrena rješenja te da je također u svom ranijem izlaganju govorio o osjetljivosti ove tematike. Dodao je da ne vidi razlog zašto odgađati formiranje komisije.

Safet Šahman: je rekao da navedeno naselje ne pripada naseljenom mjestu Varalići te predložio da Komisija izađe na teren i sagleda situaciju.

Usljedila je pauza u radu Vijeća od 5'.

Nakon pauze predsjedavajući je prijedlog odluke o utvrđivanju registra mjesnih zajednica, naseljenih mjesta i dijelova naseljenih mjesta na području općine Kakanj sa amandmanima vijećnika Petrovića i Aliefendića stavio na glasanje i nakon glasanja konstatirao da je isti usvojen sa 28 glasova za, niko protiv i niko

uzdržan.

Predsjedavajući je prijedlog odluke o utvrđivanju naziva ulica, trgova i mostova na području općine Kakanj stavio na glasanje i nakon glasanja konstatirao da je isti usvojen sa 27 glasova za, 2 protiv i niko uzdržan.

Tačka 15.

Prijedlog odluke o postupku registracije i načinu vođenja Registra mjesnih zajednica Općine Kakanj

Pošto nije bilo prijavljenih za raspravu, predsjedavajući je prijedlog odluke o postupku registracije i načinu vođenja Registra mjesnih zajednica Općine Kakanj stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

Usljedila je pauza do 14h i 30'.

Tačka 16.

Prijedlog odluke o dopunama Odluke o administrativnim taksama Općine Kakanj

Pošto nije bilo prijavljenih za raspravu, predsjedavajući je prijedlog odluke o dopunama Odluke o administrativnim taksama stavio na glasanje i nakon glasanja konstatirao da je isti usvojen sa 21 glasom za, niko protiv i niko uzdržan.

Tačka 17.

Prijedlog odluke o davanju saglasnosti za izgradnju sportske dvorane za potrebe kakanjskog sporta i za potrebe STŠ „Kemal Kapetanović“

Izvjestilac je bio Rešad Zaimović, pomoćnik općinskog načelnika.

Pošto nije bilo prijavljenih za raspravu, predsjedavajući je prijedlog odluke o davanju saglasnosti za izgradnju sportske dvorane za potrebe kakanjskog sporta i za potrebe STŠ „Kemal Kapetanović“ stavio na glasanje i nakon glasanja konstatirao da je isti usvojen sa 25 glasova za, niko protiv i niko uzdržan.

Tačka 18.

Prijedlog odluke o dopuni Odluke o utvrđivanju javnog interesa u svrhu izgradnje kanalizacionog sistema u naselju Tršće

Pošto nije bilo prijavljenih za raspravu, predsjedavajući je prijedlog odluke o dopuni Odluke o utvrđivanju javnog interesa u svrhu izgradnje kanalizacionog sistema u naselju Tršće stavio na glasanje i nakon glasanja konstatirao da je isti usvojen sa 26 glasova za, niko protiv i niko uzdržan.

Tačka 19.

Prijedlog odluke o dodjeli petnaestoaprilskih priznanja Općine Kakanj

Izvjestilac je bio Slaven Katičić, predsjednik Komisije za dodjelu 15.aprilskih priznanja.

U diskusiji su učestvovali: Semir Mušija, Slaven Katičić, Nusret Muslić, Rizah Haračić, Haris Veispahić i Mirsad Tursum.

Semir Mušija: je rekao da klub vijećnika SBB-a neće podržati ovaj prijedlog jer je član Komisije iz SBB-a na sastanku OO SBB-a prezentirao način rada ove Komisije i tom prilikom im pojasnio da je prijedlog odluke koji se odnosi na Grb i Plaketu predložen nakon što je istekao rok za prijavu propisan javnim pozivom. Rok za prijavu je bio 11.03.2017. godine, a kandidati za Grb i Plaketu su predloženi 27.03.2017. godine na trećem sastanku.

Slaven Katičić: je rekao da je Komisija zasjedala triput te da je na prvom sastanku definirala tekst javnog poziva i uputila javni poziv, na drugom sastanku otvorila sve prijave i dogovorila da svaki član komisije izvrši konsultacije sa svojim političkim klubom. Komisija je treći sastanak održala 27.03.2017. godine i članovi su usaglasili da prvo predlažu kandidate za Grb. Otpočetak nije bilo jasno definirano koji kandidat ima podršku pa je, član Komisije, Nijaz Đokić predložio da se u opticaj stavi i prijedlog JU KSC Kakanj

(prijedlog za Plaketu) obrazlažući to 50.godišnjicom djelovanja i njihovom značajnom doprinosu u razvoju kulture, sporta, obrazovanja i pozitivnoj promociji Kaknja. To je stvorilo određene nedoumice kod, člana Komisije, Ibrahima Herceglje. Komisija je pristupila pojedinačnom izjašnjavanju o predloženim kandidatima po onom redu kako su evidentirali prijave, te dodao da je, nakon izjašnjavanja o prvom kandidatu, kolega Herceglja napustio sjednicu, a Komisija je nastavila sa izjašnjavanjem pojedinačno o svakom kandidatu za Grb. Nakon što nijedan predloženi kandidat nije dobio potrebnu većinu Komisija je uvažila prijedlog Nijaza Đokića, te se o njemu zadnjem izjašnjavala i prijedlog je dobio četiri glasa za. Slična situacija se ponovila i sa Plaketom gdje su dovoljan broj glasova dobili Rudarska glazba i Igor Andrijević, a treći prijedlog je bio prijedlog Saliha Hasagića da se plaketa dodijeli Rešadu Merdiću koji je bio kandidat za Zahvalnicu. Sljedeći korak u radu Komisije je bio razmatranje i glasanje oko prijedloga za dodjelu Zahvalnica gdje je postignut dogovor. Na kraju je dodao da Komisija za dodjelu petnaestoaprilskih priznanja nema svoj Poslovnik o radu nego je koristila Poslovnik o radu Općinskog vijeća, te da nije prekršila niti jedan propis kod biranja kandidata. Ukoliko Vijeće ne prihvati ovakav prijedlog, korektno bi bilo da Komisiju smijeni.

Nusret Muslić: je izrazio žaljenje što se priznanja dijele po političkoj liniji i dodao da Komisija iz moralnih razloga treba da podnese ostavku. Upitao je predsjednika Komisije odnosno da li je Komisija čitala obrazloženja pojedinačnih prijedloga. Rekao je da je DF za Grb općine Kakanj predložio Lovačko društvo „Srndać“, društvo koje djeluje skoro 70 godina, za Plaketu su predložili Eseda Kadrića zvanog Dedo koji je jedan od najstarijih pripadnika Armije R BiH, a za Zahvalnicu predložena je redakcija emisije na NTV IC „Budimo humani“.

Rizah Haračić: je rekao da bi klub vijećnika SBB-a podržao ovaj prijedlog odluke da je Komisija izabrala nekog ko je predložen u roku predviđenom za predlaganje. Dodao je da su svi prijedlozi koji su stigli na adresu ove Komisije dostojni priznanja ali klub vijećnika SBB oni neće podržati ovakav prijedlog odluke jer smatra da je prekršena procedura propisana javnim pozivom.

Haris Veispahić: je rekao da je rasprava oko ovog prijedloga odluke gotovo ista svake godine jer su mišljenja različita i ta polemika i reakcije vijećnika na neki način i devalviraju priznanja. Rješenje je prihvatiti prijedlog Komisije obzirom da joj je Općinsko vijeće dalo povjerenje da odabere kandidate za ovu godinu. Dodao je da ispred kluba vijećnika SDA daje podršku i Komisiji i prijedlogu odluke. Naglasio je da ovdje političari nije mjesto i ovo ne bi trebalo da izaziva širu raspravu jer Komisija nije prekršila proceduru.

Mirsad Tursum: je čestitao Komisiji koja je između tako dobrih kandidata za Grb općine Kakanj izabrala JU KSC Kakanj. Dodao je da će ovo priznanje biti podstrek JU KSC da još bolje radi a Klub vijećnika S BiH će podržati ovakav prijedlog odluke.

Slaven Katičić: je odgovorio da li su svi članovi Komisije dobili skenirane pristigle prijedloge na e-mail. Komisija je imala pregled dobitnika priznanja unazad 10 godina te da je vodila računa i o tome. Pročitao je i spisak podnesenih prijedloga i dodao da je samo jedna prijava na javni poziv bila van roka a sve ostale su stigle u predviđenom.

Predsjedavajući je prijedlog odluke o dodjeli petnaestoaprilskih priznanja Općine Kakanj stavio na glasanje i nakon glasanja konstatirao da je isti usvojen sa 18 glasova za, 4 protiv i 4 uzdržana.

Tačka 20.

Utvrđivanje Prijedloga upisnog/gravitacionog područja osnovnih škola u općini Kakanj

Izvjestilac je bio Rešad Zaimović, pomoćnik općinskog načelnika.

Pošto se niko nije javio za raspravu, predsjedavajući je uvrđivanje prijedloga upisnog/gravitacionog područja osnovnih škola u općini Kakanj stavio na glasanje i nakon glasanja konstatirao da je isti usvojen sa 26 glasova za, bez glasova protiv i bez glasova uzdržanih.

Tačka 21.

Informacija o stanju sigurnosti na području Policijske stanice Kakanj za 2016. godinu

Izvjestilac je bio Vahidin Topalović, komandir Policijske stanice Kakanj.

U diskusiji je učestvovao Edin Aliefendić

Edin Aliefendić: je rekao ako uzmemo u obzir činjenice koje je komandir Policijske stanice iznio i ako ih stavimo u kontekst F BiH i Ze-do kantona možemo zaključiti da je Kakanj jedan od najsigurnijih gradova. Zatim je iskoristio priliku da čestita Policijskoj stanici Kakanj na njihovim aktivnostima i izrazio nadu da će se dobra saradnja lokalne zajednice i Policijske stanice nastaviti i u daljem periodu.

Rizah Haračić: je pohvalio rad Policijske stanice i predložio da se u tabeli 3 uvrsti i stavka „vožnja pod dejstvom opojnih droga“ i najavio da, ukoliko Policijska stanica, nema ovu opremu, klub vijećnika SBB će pokrenuti inicijativu da se ista nabavi a sve u cilju bolje sigurnosti građana.

Eldin Mijoč: je uputio čestitke komandiru Policijske stanice. Osvrnuo se na zloupotrebu tableta prilikom glasanja, jer je evidentno da ima više elektronskih glasova nego vijećnika prisutnih u sali Vijeća. Dodao je da je nabolje da se vrati na način glasanja gizanjem pločica. Najavio je da će klub vijećnika SDP na narednoj sjednici pokrenuti inicijativu da se uvede stari način glasanja obzirom da ovaj nije legitiman.

Predsjedavajući: je rekao vijećniku Mijoču da je trebao odmah reagirati ukoliko je primijetio nepravilnost te da je danas u nekoliko navrata bilo intervencija od strane vijećnika da im prijave ne prolaze te su prilikom glasanja dizali ruku. Dodao je da nijedna odluka nije donesena sa 16 glasova pa da se u ishod glasanja sumnja.

Predsjedavajući je Informaciju o stanju sigurnosti na području Policijske stanice Kakanj za 2016. godinu stavio na glasanje i nakon glasanja konstatirao da je ista primljena k znanju s 26 glasova za, niko protiv i niko uzdržan.

Tačka 22.

Izvještaj o finansijskom poslovanju JU za predškolski odgoj i obrazovanje „Mladost“ Kakanj za 2016. godinu

Pošto nije bilo prijavljenih za raspravu, predsjedavajući je Izvještaj o finansijskom poslovanju JU za predškolski odgoj i obrazovanje „Mladost“ Kakanj za 2016. godinu stavio na glasanje i nakon glasanja konstatirao da je isti usvojen sa 26 glasova za, niko protiv i niko uzdržan.

Tačka 23.

Informacija o radu Komisije za dodjelu interventnih sredstava za pomoć

Vijeće je odgodilo raspravu o ovoj tački dnevnog reda.

Predsjedavajući je zaključio rad 6. sjednice Općinskog vijeća Kakanj.

Sjednica je završena u 15:35 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić
